

LEKTURANAN DI MUCHA

Pakiko Dios a Manda Profetanan?

Promé Sabat

Hoya di Memoria: “Seguramente Señor Dios no ta hasi nada, sin ku E revelá Su sekreto na Su sirbidónan, e profetanan” (Amos 3:7).

Volody i e Bestianan

Ta kiko e kos abou na suela ei ta? Volody di 10 aña a sak abou i kohé un buki ku un hende mester a tira afó. E kaft ta bisa: Beibel Santu. E mucha hòmber di Ukraina nunca tabata den un iglesia, pero el a tende ku Beibel ta papia tokante milagernan, i kosnan sobrenatural tabata interes’é. El a kue e Beibel, un vershon di storianan di mucha sin kapítulo- i versíkulonon, i a bai kas kuné.

Durante e siguiente par di dia Volody a lesa porshonnan di e Beibel ku el a haña. Ainda, e Dios di e Beibel tabata parse leu, no realmente un hende ku ken un mucha hòmber di Ukraina di 10 aña por a relashoná. Volody a pone e Beibel un banda i no a pensa masha riba dje.

Un dia ora Volody tabata warda den rei pa kumpra pan pa su mama, un poster ei serka a kapta su bista. *Ta di kiko esaki ta trata?* Volody a puntra su mes. Riba e poster tabatin mònsternan straño, ku tabata parse spantoso—algun di nan ku mas ku un kabes! Studiando e poster mas

djaserka, el a mira ku e posternan tabata menshoná e Beibel! Di akuerdo ku e poster, e mònsternan ei tabatin algu di aber ku profesianan den e buki bíbliko di Daniel.

*Mi no tin kunes ku e Beibel, pero mi tin ku siña mas tokante e mònsternan ei! Volody a bisa su mes. Ademas, e oradó tabata un Merikano. ofisialnan di gobièrnu a spièrta: “E merikanonan ei ta diabelnan real!” Otronan a bisa: “Nan tin kachu i rabu!” Ya ku Volody no tabatin niun otro manera pa sa, e tabata determiná pa haña sa e bèrdat. Volody a nota e ora i lugá di e promé reunion. *Mi tin ku mira tur esaki pa mi mes!* el a pensa.*

Ora e fecha a yega, Volody a haña un lugá di sinta i ansiosamente el a warda riba e presentashon. Kon e Merikano lo tabata realmente? Pero ora e oradó a aparesé, e no tabatin ni un rabu *ni* kachu! De echo, e tabata parse un ser humano normal hopi!

Volody a keda pa e presentashon i a siña ku e bestianan ei tabata representá algun kos importante ku lo a sosodé den futuro. Esaki tabata ser yamá “profesia”.

Komo si fuera e notisianan ei no tabata suficiente, Volody a tende e oradó papia tokante Hesus. A resultá ku sentenar di profesianan di Beibel tabata relashoná kunE! E Merikano a papia tokante kon Hesus a stima hende asina tantu ku El a muri pa nan, inkluyendo Volody! Ainda mas impreshonante, el a siña ku Hesus tabata biniendo bèk pa hiba hende shelu! Mas profesia di Beibel tabata konta tokante e futuro evento akí. Pa algun motibu tabata parse ku e Beibel ku Volody a haña no tabata inkluí e parti ei.

Finalmente Volody a haña un Iglesia Atventista di e di Shete Dia den stat i el a kuminsá siña mas tokante profesia i Heskristu. El a aseptá Hesus komo su Salvador i a primintí di sirbiE no importá kiko. Lo a bin tempunan ora esei lo no tabata fásil, pero Volody a mantené su promesa.

Volody a siña hopi tokante futuro ora el a asistí na e reunionnan di profesia ei, pero tabatin algu den su propio futuro ku e no por a mira. Finalmente Volody a bira un pastor Adventista di e di Shete Dia i a muda pa Estádos Unídos. Te asina leu, e úniko Merikano ku el a mira ku kachu i un rabu tabata na Halloween. Nan ta representá diabel, i Volody no ke tin nada di hasi kuné! (Storia adaptá for di Ellen Weaver Bailey, “Volody and the Weird Beasts,” *Guide*, April 23, 2016.)

Konsiderá Esaki

Pakiko Dios a manda profetanan?

Bo por pensa riba un profesia di Beibel? Ken a hiba e mensahe? Di kiko e tabata trata?

Lo bo ke ta un profeta? Dikon òf dikon no?

Hasié!

Djis pa prèt, skirbi eksaktamente kiko bo ta kere lo ta e promé palabranan ku bo ta tende mayan *kualke kaminda pafó di bo propio kas*. Skucha kuidadosamente! Bo tabatin rason?

Si t’asina, esaki ta hasi bo un profeta? Dikon òf dikon no?

Sorprendé un amigu dor di must’é e profesia di Siro den Isaias 45:1-3. Kiko tabata su reakshon? Dikon bo ta kere ku e persona a reakshoná di e forma ku el a hasié?

Djadumingu

E Poder Tras di e Profetanan

Hoya di Memoria: “Pasobra nunca profesia no a wòrdu duná pa medio di e boluntat di hende, ma hòmbènan santu di Dios a papia, inspirá dor di Spiritu Santu” (2 Pedro 1:21).

Tené Bou di Menasa di Arma!

Diane a wak abou den e lop di tres arma outomátiko. “Nos ta bai yena bo yen di buraku!” un di e sòldánan gueria a grita. E pais akí tabata den un estado di disturbio pa algun tempu, i awor Diane tabata eksperensiando esaki personalmente.

E tabata den un bús, biniendo bèk for di bishitá un orfanato. Den e skuridat di mainta trempan, sòldánan a sali for di e mondi yen di lodo i a para e bús.

“Boso a tende ku nan a bombardiá e toren di komunikashon na San Luis?” un pasahero a puntra pokopoko. “Sí, i na parti ost nan a mata algun hende!” un otro a bisa.

E sòldánan gueria a subi den e bús. “Tur hende sali pafó!” un di e sòldánan a duna òrdu. E sòldánan armá pafó a ranka e porta di bús habri.

Un pa un e pasaheronan a bula abou dor di e salida patras. Despues a yega burt di Diane, i e tambe a bula. Ta e ora ei e sòldá a bisa Diane ku nan tabata bai tira nan.

Pero awor Diane a wak patras na e porta di patras di e bús i a mira un señora bieu, ku lomba doblá, pará den e porta. Direpente Diane a tende un bos kalmu den su mente bis'é: *Yuda e señora bieu ei*. Yen di kurashi, Diane a bira lomba pa e sòldánan i a bisa e señora bieu: “Bin señora, laga mi yuda bo baha.” Diane a yuda e señora baha abou miéntras e sòldánan tabata para wak sin sa kiko pa hasi.

Diane a sigui yuda otronan baha: muchanan, un mama ku un beibi, i un otro señora hende grandi. Despues ku el a kaba, Diane a bira i a mira e sòldánan pará, ku nan armanan abou, kantu di nan kurpa.

Tabata bai tin mas eksitashon promé ku e agonia a terminá, pero niun di e pasaheronan a pèrdè nan bida. Danki na Diane ku a skucha na un bos chikitu, ku su akshonnan a frustra e plannan di maldad di e sòldánan pa tuma su bida. Semper ta mihó pa sigui e instrukshonnan di e bos selestial ei!

Konsiderá Esaki

Pensa riba un momentu ku bo a ser pidí pa hiba un mensahe. Tabata un mensahe skirbí òf papiá? Bo tabata eksitoso?

Bo por pensa di un biaha ku un hende a bisa bo algu ku bo no ke a tende? Kiko bo a hasi?

Dikon bo ta kere ku Dios a uza profetanan na lugá di djis duna nos mensahenan di forma direkto?

Hasié!

Reuní un par di amigu i bisa un mensahe pokopoko den oreá di e promé persona. (E mensahe no por ser ripití.) Hasi esaki pa kada persona i mira kon presis e mensahe ta ora e yega serka e último persona. Kiko ta yuda e mensahe di un profeta pa no ser konfundí?

Pidi un mayor òf otro ser kerí pa kompartí un momentu ku nan a risibí un mensahe ku a kambia nan bida. Nan tabata kontentu ku nan a hasi loke e mensahe a bisa nan pa hasi? Dikon òf dikon no?

Djaluna

Bèrdat òf Falsu?

Hoya di Memoria: “Na nan fruta bosó lo konosé nan” (Mat. 7:16).

E Guera ku Nunka a Tuma Lugá

Mike tabata un profeta. A lo ménos, esei ta loke hopi hende tabata pensa.

Un dia Mike a skirbi kuidadosamente e siguiente profesia misterioso:

“Mars i e sèpter lo ta huntu,

Un guera di kalamidat bou di Kanser.

Un korto tempu despues un Rei nobo lo ser ungi,

Kende lo trese pas na tera pa un tempu hopi largu.”

Kiko e profesia straño akí por tabata nifiká? “Mars” i un “sèpter”? Un guera tabata bai terminá ku tur hende hañando kanser? Ken tabata e “rei nobo” akí?

Esaki no tabata e promé profesia ku ta bin di Mike, ken su nòmber real tabata Michel de Nostredame. E hòmber tabata un dòkter franses ku a biba di 1503 te 1566. Finalmente el a bira konosí simplemente komo Nostradamus.

Nostradamus a skirbi un buki ku ta kontené 942 profesia poétiko di 4 liña yamá “kuarteto”. E buki, ku su título na ingles ta simplemente *The Profecies (E Profesianan)*, ainda ta

ser uzá, i keré, dor di hopi hende. Tur e “profesianan” den e buki ta zona basta straño, meskos ku esun akiriba.

Awor, ke tal di e profesia akiriba? Bo por saka afó ki evento e ta pronostikando? A lo largu di e siglonan algun hende a hasi un par di sugerensia. Un di esnan mas resien tabata envolví algun hende ku a bisa ku “Mars” tabata planeta Mars, i e “sèpter” tabata referí na planeta Jupiter. E dos planetanan akí supuestamente lo tabata “huntu”, òf “banda di otro”, den espasio riba 21 di yüni 2002. Ta e ora ei un guera teribel lo a kuminsá!

Ku eksepsion ku e no a sosodé.

En realidat, hopi eksperto ta di akuerdo ku e profesianan di Nostradamus por nifiká, bon, masomé nos kualke kos ku bo ke pa nan nifiká!

Ta importante pa kòrda ku bisa futuro no semper ta e trabou prinsipal di un profeta. Kisas nan por skirbi, prediká, òf hiba e mensahe di Dios den algun otro forma tambe.

Pero kon bo sa si un profeta ta realmente un mensahero di Dios? Ata kua forma ku por yuda bo sa si e mensahe di un profeta ta for di shelu, òf di algun otro kaminda.

BEIBEL. Profeta Isaias a skirbi: “Bai na e lei i na e testimonio! Si nan no ta papia konforme e palabra akí, ta pasobra nan no tin lus den nan” (Isaias 8:20). Den otro palabra, un hende su profesia mester kuadra ku loke Beibel ta bisa riba e tema.

AKSHONAN. “Na nan fruta boso lo konosé nan” (Mateo 7:16). Kon e persona ku ta bisa di ta un profeta ta biba su bida? Nan ta gaña? Nan ta uza palabra malu? Bida di un berdadero profeta lo demostrá e frutanan di Spiritu menshoná den Galationan 5:22, 23, rasgonan manera amor, mansedumbre, i dominio propio. Den otro palabra, kon Hesus ta!

RESULTADONAN. “Ora ku e palabra di e profeta wòrdu kumplí, e profeta ei lo wòrdu rekonosí komo un ku Señor a manda di bèrdat” (Jeremias 28:9). Den otro palabra, kon kosnan lo resultá despues ku e profeta hiba su mensahe? E profesia ta bira realidat?

HESUS. “Na esaki boso ta konosé e Spiritu di Dios: tur spiritu ku ta konfesá ku Hesuskristu a bin den karni ta bin di Dios” (1 Juan 4:2). Kiko e profeta ta bisa tokante Hesus? Si ta algu manera “Bon, Hesus tabata un bon maestro, ma e no tabata Yu di Dios”, kore bai den otro direkshon!

Bo Tabata Sa?

Na Merka un hòmber yamá Harald Camping a bisa di tabata sa e fecha di Hesus Su regreso.

El a haña hopi siguidó, asta despues ku Hesus no a bin bèk riba tres diferente fecha: 6 di sèptèmber 1994, 21 di mei 2011, i 21 di òktober 2011.

Algun profeta falsu ta ser mensioná den Beibel, inkluyendo unu yamá Ananias. Bo por lesa di dje den Jeremias 28:15-17.

Konsiderá esaki

Dikon un hende ku no ta un profeta real lo ta reklamá di ta un?

Bo ta kere ku Satanas kisas por ta tras di sierto profesianan falsu? Dikon òf dikon no?

Kon bo ta pensa ku lo bo a reakshoná si un hende yega serka bo i bisa bo ku e ta un profeta mandá dor di Dios?

Djamars

Kon pa Komprondé un Mensahe di un Profeta

Hoya di Memoria: “Hasi tur bo esfuerso pa presentá bo mes aprobá dilanti di Dios manera un trahadó ku no tin motibu pa tin bèrgwensa, ku ta parti e palabra di bèrdat na un manera korekto” (2 Timoteo 2:15).

Kibrando e Kódigo

Ki un piedra straño! Pierre mester a pensa. Tabata yùli 1799. Un hòmber yamá Pierre-François Bouchard tabata yuda rekonstruí un fòrti Egipsio antiguo serka di e siudat di Rosetta na Egipto. Direpente el a ripará algu ku tabata sali for di suela. A resultá ku tabata un plachi pretu grandi di piedra. E piedra tabatin kos skirbí riba dje!

Despues hendenan a kuminsá studia e plachi di piedra pretu, di un tòñ, kua tabata kontené porshonnan di mensahenan skirbí den tres diferente idioma òf “eskritonan”. E promé idioma tabata Griego, i e di dos tabata un idioma egipsio yamá Demótiko. E di tres sèt di eskrito tabata heroglífiko egipsio, un sistema di skirbi basá riba símbolo- i pinturanan.

E ekspertonan tabata eksitá! Nan a realisá ku e tres diferente idiomanan mester tabata kontando e mesun historia! Te na e momentu ei, niun hende a haña sa e sekreto pa komprondé e plachinan di palabra Egipsio super bieu akí. Pero awor, dor di uza e promé dos idiomanan komo nan “klave kódigo”, finalmente nan por ta kapas na komprondé e nifikashon di e di tres idioma: heroglífiko!

A tuma hopi tempu pa komprondé henter e Rosetta Stone (Piedra di Rosetta), ma tabata bale la pena. Danki na su deskubrimentu, ku finalmente e “kódigo” antiguo di heroglífiko egipsio a ser kibrá!

Meskos ku hende tabatin mester di e Rosetta Stone pa komprondé heroglífiko, nos tin mester di e informashon korekto pa komprondé profesia *korektamente*. Sin e informashon korekto pa komprondé profesia, nos lo terminá *robles* partiendo (tradusiendo) e palabra di bèdat (e Beibel)! Demasiado hende ta hala bai for di e Beibel ora nan ta purba komprondé un profesia i ta terminá ku algun interpretashonnan bastante absurdo!

Ata algun tep pa yuda mantené *abo* riba e kaminda korekto ora bo ta lesa un profesia:

Semper hasi orashon pa Spiritu Santu yuda bo komprondé e mensahe di un profeta. Aseptá tur e yudansa selestial ku bo por haña!

Konosé bo Beibel. Asta si ta parse difísil pa komprondé un profesia, e lo yuda bo konosé e idea general tras di e mensahe prinsipal di Beibel tokante Dios: E ta stima bo i E ke hiba bo shelu algun dia. Beibel ta e fundeshi pa yuda bo komprondé mas i mas segun ku bo ta krese i krese!

Purba un Beibel ku ta pas mas pa mucha. E lo por yuda pa e teksto tin mas sentido pa bo.

Pidi yudansa di hende ku bo ta konfia. Profesianan por ta konfuso! Si bo no por komprondé e mensahe di un profeta, òf si bo a tende dos diferente interpretashon, buska yudansa di un hende ku bo sa ku ta stima Hesus.

No pensa ku bo mester sa tur kos *awor*. Pidi Dios kada dia pa mustra bo loke bo mester sa tokante djE. Ora e momentu ta apropiá, E lo trese komprondementu na bo mente—un profesia a la bes.

Bo Tabata Sa?

E palabranan riba e Rosetta Stone ta realmente bastante laf. E ta un kopia di un dekreto ku ta selebrá e dia ku Ptolemy V Epiphanes a bira rei di Egipto.

Egipto ta aparesé den hopi profesia di Beibel, inkluyendo esun aki den Oseas 11:1: “Tempu ku Israel tabata mucha, Mi tabata stim'é, i for di Egipto Mi a yama Mi yu hòmber.” Na unda Hose i Maria a hiba Hesus pa skapa di Rei Herodes? Sí, Egipto! For di aya, e famia chikitu a bai biba na Názarèt, kua ta ora Hesus a ser “yamá” pa sali for di Egipto.

Konsiderá Esaki

Bo a yega di hasi un deskubrimentu eksitante? El a yuda bo den algun manera? Si ta asina, kon?

Kon bo ta sinti or abo no por komprondé algu? Kiko bo ta hasi ku esei?

Bo por pensa riba un profesia di Beibel ku ta fásil pa komprondé? Kiko e ta nifiká pa bo?

Djárason

Hoya di Memoria: “Ma boso ta un rasa skohí, un saserdosio real, un nashon santu, un pueblo pekuliar, pa boso por proklamá e alabansanan di Esun ku a yama boso for di skuridat na Su lus maravioso” (1 Pedro 2:9).

E Kurashi di Krystal

Krystal tabata hopi brait. En realidat, si punto tabata nifiká kualke kos, Krystal tabata e studiante di mas brait den su klas.

Un dia Krystal a keda sorprendí pa palabranan bisá dor di su maestro, Sr. Campbell. “Bo a kustumá muchu pa haña bon punto,” e maestro a bisa Krystal di forma duru. “Awèl, laga mi bisa bo un kos: Mi ta bai hasi tur loke mi por pa drecha e ‘problema’ ei.”

Konfundí, Krystal a purba komprondé dikun Sr. Campbell tabata asina kruel kuné. Siendo un di e poko Kristiannan na su skol públiko, Krystal tabata puntra su mes si su fe tabatin algu di aber ku e aktitut di Sr. Campbell.

Segun ku simannan tabata pasa, Sr. Campbell a sigui hasi bida difísil pa Krystal. Un dia den klas e tópiko a bira na kon bida a bin na eksistensia. Mayoria di su kompañeronan di klas parse tabata kere den evolushon. Un a bisa ku e tabata kere den kreashon, pero e seis dianan menshoná den Beibel realmente mester tabata miónes di aña. Finalmente Krystal a papia.

“Mi ta kere loke Beibel ta bisa tokante kreashon,” el a bisa. E ta bisa: “Den seis dia Señor a trata e shelunan i tera, laman, i tur loke tin—”

“Warda!” Sr. Campbell a interumpí di forma brutu. “Bo ta purba bisa nos ku realmente bo ta kere e ko’i kèns ei?”

“Sí,” Krystal a kontestá. “Si Dios ta ken E ta bisa ku E ta, dikon E no por a krea mundu den seis dia? Dikon e lo tabatin mester di miónes di aña? Djis pasobra nos no por komprondé e tipo di poder ei no ta nifiká ku e no ta eksistí.”

“Esei ta papiamentu di ko’i loko!” Sr. Campbell a bisa ku un tono di despresio. “Ke tal di e dinosauronan? Kiko a pasa ku nan?” el a puntra.

Ora Krystal a splika su kreensia den e diluvio di Noe, Sr. Campbell a tira su kabes patras i a hari. “Di bèrdat bo ta kere e kos ei? Kon kèns bo por bira?”

A parse manera algu malu a bin riba Sr. Campbell e momentu ei. El a kore ban den gan di e skol. Ora el a mira un par di dosente i un grupo di studiante, el a grita: “Boso mester bin akiden i skucha loke Krystal ta kere!” Pronto e sala tabata yená ku dosente i studiante i nan tur tabata hasi chèrchi di Krystal.

Apesar di tur e problema ku Sr. Campbell a sigui kousa, Krystal su puntonan a keda mihó ku tur otro hende. Esaki tabata nifiká ku e lo tabata bai tene un diskurso e último siman di skol.

Un dia e kabes di skol yam’ é un banda. “Krystal, mi sa ku bo ta un Kristian, pero bo no por inkluí un orashon den bo diskurso. Esei ta kontra lei.”

Pero Krystal tabata sa ku esei no tabata bèrdat. “Nò, Sr. Sheffield, lei ta bisa ku mi por tin un orashon tanten ku ofisialnan di skol no bisa nos kiko pa bisa.” E kabes di skol tabata sa ku el a wòrdu derotá.

Ora e dia di diskurso a yega, Krystal a kana bai riba e plataforma, baha su kabes i a hasi orashon. Despues di a bisa “Amèn”, el a sigui i a duna un diskurso poderoso.

Despues Krystal a wòrdu felisitá for di famia, amigu, kompañeronan di klas, i otronan. Ki gradesidu e tabata ku e Dios ku a kre' é a yud' é pa keda fuerte p' E.

Konsiderá esaki

Bo a yega di tende di Ellen White anteriormente? Si t'asina, kiko bo ta pensa?

Si bo sa algu tokante e obra di Ellen White, ki palabranan ta bin den bo mente ora bo pensa riba dje? Sea honesto i kompartí i diskutí bo kontesta na momentu di kulto familiar òf Sabatskol.

Ki situashonnan den bo bida i rònt mundu bo ta pensa ku lo por uza algun sabiduria di shelu?

Na unda bo por haña sa si Ellen White a skirbi algu tokante e tipo di situashonnan akí?

Hasié!

Dal un paseo den un parke, den mondi, òf den un otro ambiente di naturalesa. Skirbi por lo ménos sinku kos ku bo ta mira ku ta pone ku ta difísil pa bo kere den evolushon.

Durante e siguiente par di simannan, skirbi algun problema ku bo tin den bo bida. Sea bo mes òf ku yudansa di un amigu i/òf un adulto ku bo ta konfia, wak si bo por haña algun yudansa ku algun di e problemanan akí den e eskritonan di Ellen White. Bo maestro di Sabatskol òf pastor por yuda. Si bo tin aksesu na internèt, bo por wak einan tambe.

Les a òf wak un video tokante dinosouro. Loke bo ta lesa ta kuadra ku loke Ellen White i Beibel ta bisa?

Djaweps

Hoya di Memoria: “Boso yunan hòMBER i yunan muhé lo profetisá, boso ansianonan lo soña soñonan” (Joel 2:28).

E Soño di e Serzjant di Polis

Vários ofisial di polis na South Auckland, New Zealand, tabata kansá di tin asina tantu krímen den nan área. “Kiko nos por hasi pa yuda kambia kosnan?” nan tabata puntra otro.

“Ke tal si nos lo por duna esnan ku kometé krímen pa promé biaha algu pa lesa ku lo yuda nan hasi mihó eskohonan den futuro?” e serzjant mayó a puntra. Segun ku e ofisialnan a sigui papia, an a bin ku e idea pa un revista tokante kriminalnan ku a duna nan bida na Hesus. Nan lo a yama e revista *Crime 2 Christ (Krímen pa Kristu)*. Tur hende tabata eksitá tokante e idea pa e revista nobo, pero nan departamento di polis no tabatin suficiente sèn pa finansi’è.

Despues, un anochi e mesun serzjant di polis ei tabatin un soño straño. Den e soño tabatin un hende muhé ku tabata bai haña yu. Ariba di e muhé tabatin e palabranan “Atventista di e di Shete Dia” skirbí.

Direpente e serzjant a spièrta. *Mi mester skirbi loke mi a kaba di soña*, el a bisa su mes. Despues ku el a skirbi e soño, el a bai drumi bèk.

Siguiente mainta na e warda di polis e serzjant a konta e otronan kiko e tabata kere ku e soño tabata nifiká. “Mi ta kere ku Iglesia Atventista di e di Shete Dia lo ‘duna lus’ na e proyekto di revista aki,” el a bisa.

“*Ami ta un Atventista di e di Shete Dia,*” un di e ofisialnan a bisa di forma eksitá, “i mi sa di un iglesia Atventista lokal ku lo ta interesá pa yuda!”

Pronto e serzjant di polis a topa ku Pastor Hurlow di Papatoetoe Seventh-day Adventist Church ei serka. “Sí,” e pastor a bisa ku un smail, “nos lo tin gana di yuda ku e proyekto di revista akí.” Pero Pastor Hurlow a splika ku miéntras nan lo tabata yuda ku skirbi i otro tareanan, nan no por a proveé ku sèn pa e proyekto.

E siguiente día mes un señora a kana drenta den e warda di polis i a pidi pa papia ku e serzjant mayó. Ora e hòmber a aparesé, e señora a bisa: “Dios a manda mi aki. Mi no sa pakiko, pero bisa mi kiko boso ta hasiendo den komunidad.”

Despues ku e serzjant a kont’ é di e proyekto di revista, e señora a bisa: “Awor mi sa pakiko Dios a manda mi aki pa papia ku bo. Nos lo tin gana di duna algu di sèn. Mi ta bai hasi orashon i papia ku algun hende. Despues lo mi bin bèk serka bo.

Un par di dia despues e señor a bin bèk na e warda di polis. “Mi tin \$10.000 kla pa boso uza pa e proyekto di revista.” el a bisa ku un smail. Esaki tabata suficiente pa prent e promé edishon di e revista! “Ahan,” e señora a añadí. “Mi tin tambe mas sèn pa boso siguiente edishon.”

E promé edishon di *Crime 2 Christ* tabata inkluí e storia di Amos, un miembro fundadó di un gang grandi yamá The Head Hunters, i un muhé ku a bai di un bida di krímen na sigui Hesukristu. Hopi hende a ser batisá pasobra nan a lesa algu den e revista *Crime 2 Christ* ku a toka nan kurason.

Ora Dios duna un hende un soño, E ta yuda tambe pa e bira realidat!

Bo Tabata Sa?

Beibel ta bisa ku soñonan ainda ta hunga un ròl den profesia. (Lesá e Hoya d Memoria di awe.)

Ya ku e trabou di un profeta por inkluí mas ku bisa e futuro, manera siña, prediká, asta soña, kisas algun dia Dios por skohe *abo* pa ta un profeta—asta si bo no por bisa e futuro!

Konsiderá Esaki

Kiko ta algun maneranan pa yuda sa si un hende su soño (òf kualke otro mensahe) ta realmente di Dios?

Ya ku e don di profesia por inkluí siña i prediká, *tur* maestro i predikadó ta profeta? Dikon id ikon no?

Hopi Kristian ta kere ku e “Dia Skur” di 1780 tabata un señal profétiko. (George Washington en realidat a skirbi di dje.) Awe algun sientífiko ta bisa ku tabata huma for di un mondi Kanadiense ku a kousa e Dia Skur. Esaki ta hasi un diferensia? Dikon òf dikon no?

Djabièrnè

Hoya di Memoria: “Esakinan ta esnan ku ta sigui e Lamchi unda ku E ta bai” (Rev. 14:4).

E Soño di e Sinta Bèrdè

Ellen tabata desanimá! E mucha muhé di 15 aña tabata stima Hesus, pero e no tabata sinti ku un dia e lo tabata bon suficiente pa agrad’E. Mas despues Ellen a skirbi tokante su sintimentunan durante e tempu akí. “Tabata parse mi ku mi destino tabata fihá, ku e Spiritu di Señor a bandoná mi, pa nunca mas bolbe. - *Ellen G. White, *Early Writings* (Washington, D.C.: Review and Herald Pub. Assn., 1882, 1945), p. 79. Lesa tambe página 80 i 81. – Pero un anochi Ellen tabatin un soño ku a yud’è mira kosnan den un lus completamente nobo.

Den e soño Ellen a mira su mes den tristesa profundo. *Si solamente mi por a mira Hesus, E lo a yuda mi sinti mihó!* e tabata pensa. Nèt e ora ei den e soño un angel a aparesé. “Bo a mira Hesus?” e angel a puntra Ellen. “E t’aki, i bo por mir’E si bo ta deseá esei. Kohe tur kos ku bo tin i sigui mi.”

Naturalmente e kier a mira Hesus! Asina, den e soño Ellen a piki su poko poseshonnan i a sigui e angel. “Sigui wak ariba,” e angel a bisa Ellen, “sino lo bo por maria i kai.”

Ki un soño Ellen tabatin! Su kurason tabata parse yen di goso segun ku e tabata sigui e angel riba un trapi stret. Al final Ellen tabata pará dilanti di un porta. “Laga bo kosnan aki,” e angel a bisa Ellen de e soño. Ku esei, e angel a zuai e porta habri . . . i ata Hesus tabata pará ei!

Apénas Ellen por a kere! Direpente el a kai na pia di su Salvador. Hesus a yega serka Ellen, i ku un smail suave riba Su kara, El a pone Su man riba e mucha muhé su kabes. “No tene miedu,” I a bisa Ellen.

Ellen tabata sinti muchu yená ku goso pa papia. Den e soño tabata parse ku e sa ku el a alkansá e siguridat i pas di shelu mes! E wowonan amoroso di Hesus ainda tabata riba dje, i Ellen su kurason a brota di goso. Awor Ellen a realisá ku tabata solamente dor di konfia den Hesus ku un día e lo a biba den shelu.

Pronto den e soño e guia angelikal a habri e porta. Ellen i e angel a bandoná presensia di Hesus, ma algu a kambia—algu demasiado maravioso pa palabra.

Awor un otro kos di mas remarkabel a sosodé den e soño. E angel a duna Ellen un sinta bèrdè. “Pone esaki banda di bo kurason,” e angel a instruyé. “Ora bo ke mira Hesus, kue e sinta bèrdè i rèk e kompletu. Hasi esaki hopi biaha, pasobra bo no ke pa e sinta lora na kònòpi,” e angel a bisa. Pa Ellen, e sinta bèrdè tabata representá fe i konfia den Hesus.

Den e soño Ellen a pone e sinta banda di su kurason i yen di goso el a baha e trapi smal bai abou. Na kaminda, e tabata alabá Dios i eksitá e tabata konta tur hende ku e topa na kaminda na unda nan por a haña Hesus.

Ora Ellen a spièrta, mundu tabata parse mas Briante, i e tabatin un pas den su kurason ku no tabata tei promé. I tur esei tabata pa motibu di Hesus!

Konsiderá Esaki

Kiko ta e esensia di e “soño di e sinta bèrdè”?

Ellen White a afektá bo bida? Si t'asina, kon?

Dikon bo ta kere algun hende a skohe pa no pone atenshon na e mensahenan di Ellen White?

Hasié!

Usa un feter, hilu, òf algu similar, traha bo propio “sinta bèrdè”. Ward'é kaminda e lo yuda bo kòrda ku kualke momentu ta un bon momentu pa konfia den Hesus! Kisas pega un promesa bíbliko faborito na e sinta.

Kòrta un pida kartulina masoméno 18 cm largu i 13 cm hanchu. Kòrta un porta ku por habri, lagando un “kozein” di masoméno ½ cm. Pinta òf buska un potrèt bunita di Hesus i leim na e parti patras di e kozein. Si bo ta deseá, b por kòrta un bentana den e porta pa mostra e kara di Hesus. Awor, kada bes ku bo habri e porta, Hesus lo ta wardando riba bo!

Di Dos Sabat

Hoya di Memoria: “Pasobra e testimonio di Hesus ta e spiritu di profesia” (Rev. 19:10).

E Vishon Inkreibel

Riba un djadumingu atardi na Lovett’s Grove, Ohio, James White a kaba di duna un sermon di entiero. Ellen, su esposa, a kana bai dilanti den e skol chikitu kaminda e entiero a ser tené. E kier a ofresé su propio palabranan di enkurashamentu. Pero Dios tabatin algu spesial planiá pa e momentu akí den historia.

Direpente Ellen a bai den vishon, algu ku el a yega di hasi hopi biaha promé. Den e vishon akí Dios a must’é esenan di e bataya invisibel ku ta tumando lugá entre Hesus i Satanás. El a mira kon un tempu Satanás tabata un angel respetá den shelu, huntu ku kon el a peka i a ser tirá riba tera. Miéntras Ellen a keda den vishon, esenan tabata pasa su dilanti. El a mira e morto di Hesus na Kalvario, i kon djadumingu lo a remplasá e berdadero Sabat komo Dios Su dia spesial. Ellen a wòrdu mostrá tambe kon Satanás lo a purba gaña hende pa pensa ku hende morto tabata bai stret shelu, i ku nan por a papia ku e sernan kerí “morto” akí.

Finalmente despues di dos ora, Ellen su vishon a terminá—ma no promé ku Dios a bis’é algu mas. E mester a skirbi e vishon akí, kua lo a bira konosí komo e vishon di e “gran kontroversia”. Dios a bis’é tambe ku Satanás lo a trata na stòp e di kompartí loke el a mira den vishon. Ora hende tabata bandoná e skol, algun a bisa: “Nos a mira kosnan straño awe!”

Pronto James i Ellen White a bandoná Ohio i a bai rumbo pa Jackson, Michigan, pa bishitá nan amigunan, famia Palmers. Djis despues ku nan a yega na kas di famia Palmers, algu a sosodé ku Ellen. Mas despues el a skirbi tokante esaki di e forma akí: “Un sensashon friu i straño a dal mi kurason, pasa riba mi kabes, i baha na mi banda drechi. . . . Mi a purba uza mi brasa i pia robes, pero nan tabata perfektamente inútil.”

Satanas ya tabata purba stòp Ellen di skirbi e vishon! Pero danki na orashon, Ellen a bira bon pokopoko. Despues el a skirbi: “Mi a wòrdu mustrá den vishon ku den e atake repentino na Jackson, Satanas a purba kita mi bida, pa asina stroba e obra mi tabata bai skirbi; pero angelnan di Dios a wòrdu mandá na mi reskate.” “Señor a tende i a kontestá e orashonnan fiel di Su yunan, i e poder di Satanas a wòrdu kibrá.” - Ellen G. White, *Spiritual Gifts* (Battle Creek, Mich.: James White, 1860), tomo 2, p. 272. Finalmente Ellen tabata kapas di kaba di skirbi henter e vishon. Bo por lesa loke el a skirbi den un buki ku yama *The Great Controvesy (E Gran Konflikto)*.

Awe, danki na e don di profesia ku Dios a duna Ellen White, e pueblo di Dios di tempu di fin sa hopi tokante kon pa ta kla ora Hesus bin atrobe. E ta un don spesial na Iglesia Atventista di e di Shete Dia. Pero e persepshonnan spesial ku Dios a duna Ellen White no ta pertenesé na solamente un grupo di hende. Ta e intenshon pa nan ser kompartí ku henter mundu! Ki un privilegio maravioso pa hunga un parti den hasi asina un diferensia pa otronan, no solamente den e bida aki, sino pa semper!

Konsiderá Esaki

Kiko lo bo a bisa si un hende a bisa bo ku Ellen White no tabata importante mas?

Ken bo ta kere tabata esun di mas importante den bida di Ellen White? Dikon?

Hasié!

Kumpra òf pidi un hende pa duna bo *Steps to Christ (Kaminda na Kristu)*, un vershon ku ta pas pa mucha. Lesa algun paragraf kada anochi promé ku bo bai drumi. E lo yuda bo siña stima Hesus mas.

Buska un par di frasenan spesialmente signifkante den *Kaminda na Kristu*, òf un otro buki di Ellen White. Skirbi e frasenan òf prent nan ku un prenter d kòmputer. Kòrta karchinan chikitu for di un kartulina i leim e frasenan riba e kartulina. Dekorá e karchinan. Kisas bo por “laminá” nan dor di plak tape hanchu transparente na tur dos banda i kòrta e rantnan. Warda e karchinan na un lugá spesial (konsiderá di traha un kahita chikitu di kartulina pa nan). Disfrutá lesando e sitanan di enkurashamentu akí ratu ratu. Kisas asta lo bo ta deseá di memorisá algun di e pensamentunan spesial akí di Dios su mensahero di tempu di fin, Ellen White.

Mantené un registro skirbí di kosnan spesialmente signifkante ku Ellen White a skirbi òf a bisa.

Si bo ke, inkluí pinturanan ku ta ilustrá e puntonan importante.